

KANTONALNA
PRIVREDNA
KOMORA TUZLA

BROJ 3 i 4/19,
mart/april
2019. godine



KOMORSKI INFORMATOR



BUDUĆNOST GRADIMO SADA

MEĐUNARODNI SAJAM GRAĐEVINARSTVA
SEEBBE 2019

17 - 20. APRIL



4G+ IZ "BH TELECOMA"



KOMPLEKS „MELLAIN“ TUZLA



"RADIUS" DOO GRAČANICA



LOVIĆ & CO LUKAVAC



Komorski informator Uvod

Poštovani čitaoci!



Zaključili smo i Komorski informator za period mart - april 2019. godine. Ovaj broj donosi i informaciju iz BH Telecoma, vrlo značajna novost, događaj godine u našoj zemlji, BiH je dobila 4G mrežu.

Bilježimo niz aktivnosti u Komori i vezanih za Komoru, posjete, sastanci, prijemi, razgovori. U ciklusu jednodnevnih besplatnih seminara na temu implementacija i problematika implementacije FUK-a održan je drugi u nizu seminara za javni sektor.

O dosadašnjoj saradnji i budućim zajedničkim aktivnostima Kantonalne privredne komore Tuzla i Ministarstva za privredu Tuzlanskog kantona, razgovarano je na sastanku u Komori.

Radno-konsultativni sastanak predstavnika Ministarstva privrede Tuzlanskog kantona i Kantonalne privredne komore Tuzla sa predstavnicima općinskih službi za privredu, urbanizam i imovinsko-pravne odnose, održan je u Tešnju.

Kantonalnu privrednu komoru Tuzla je posjetila delegacija komore Indonezije koja je nekoliko dana boravila u posjeti Bosni i Hercegovini.

Delegacija GIZ-a je boravila u posjeti Komori, razgovaralo se na temu „Inovacije i digitalizacija u malim i srednjim preduzećima u BiH“.

„Promocija poduzetništva i obrtništva u obrazovnim institucijama“ naziv je projekta Ministarstva za privredu TK a u koji je uključena i Komora.

kda su u pitanju aktivnosti komorskih tijela i udruženja, zabilježili smo sjednice UO, NO i Skupštine Komore, Odbora Udruženja za trgovinu, ugostiteljstvo i turizam te Udruženja za poljoprivredu i prehrambenu industriju.

Obezbijedili smo za naše članice i ove godine nastup na sajmu građevinarstva „SEEBBE“ u Beogradu a u saradnji sa Ministarstvom za privredu TK, realizovali smo promociju i predstavljanje Privrede TK na sajmu „Grapos Expo“ u Gračanici.

Najviše raduju nova učlanjenja u Komoru a neke od novih članica predstavili smo u pravo u ovom broju koji je pred vama, Komorski informator za mart/april...

Dino Kalesić
gl. i odg. urednik

Komorski informator Sadržaj

KANTONALNA PRIVREDNA KOMORA TUZLA

**KOMORSKI INFORMATOR
BROJ 3 i 4/19,**
mart/april
2019. godine

IZDAVAČKI SAVJET:

1. Nedret Kikanović, član
2. Mirsad Kukić, član
3. Bajazit Jašarević, član
4. Suad Selimović, član
5. Nurudin Žunić

REDAKCIJSKI KOLEGIJ:

1. Nedret Kikanović, član
2. Almir Mešić, član
3. Nurudin Žunić, član
4. Suad Selimović, član

IZDAVAČ:

Kantonalna privredna
komora Tuzla

GL. I ODGOVORNI UREDNIK:

Dino Kalesić

TEHNIČKA PRIPREMA, REPRO I ŠTAMPA:

GRIN d.o.o. Gračanica

ZA ŠTAMPARIJU:

Adnan Imerović, direktor

TIRAŽ:

500 primjeraka.

ADRESA:

Trg slobode bb
e-mail: kpktz.ba@bih.net.ba
<http://www.kpktz.ba>

	Održane sjednice UO i Skupštine Komore	4
	4G+ iz "BH Telecoma"	5
	U 2019. godini 12 novih članica za prva 4 mjeseca	6
	Seminar o implementaciji FUK-a u FBiH	7
	Delegacija Privredne komore Indonezije u Komori Tuzla	8
	„Inovacije i digitalizacija u malim i srednjim preduzećima u BiH“	9
	Održana redovna sjednica Odbora Udruženja za trgovinu, ugostiteljstvo i turizam	10
	Organizovan informativni skup za podnosiocce prijava za dodjelu bespovratnih sredstava od USAID/Sweden FARMA II	11
	Kompleks „Mellain“ Tuzla	12 i 13
	"Radius" doo Gračanica	14
	Lović & Co Lukavac	15
	Održan 45. sajam građevine SEEBBE 2019 Beograd	17
	Održan 10. međunarodni sajam 'Grapos Expo' Gračanica	18



Aktivnosti komorskih tijela...

Održane sjednice UO i Skupštine Komore

Tri sjednice Upravnog odbora i jedna sjednica Skupštine Komore



U nepuna dva mjeseca, članovi Upravnog Odbora Kantonalne privredne komore Tuzla, upriličili su tri sjednice. U istom periodu, članovi Skupštine Kantonalne privredne komore Tuzla, održali su jednu sjednicu. Na prvoj od poimnute tri sjednice UO, razgovaralo se o Prijedlogu mjera za unapređenje privrede Tuzlanskog kantona a članovima ovog komorskog tijela, o poslovnim aktivnostima u „Solana“ d.d. Tuzla, govorio je Bakir Smailagić, direktor Društva. Istakao je da „Solana“ bilježi jednu od najuspješnijih godina na šta upućuju brojni pokazatelji za 2018. godinu.

“Uspjeli smo prodati ne samo cjelokupnu proizvodnju za 2018. godinu nego i sve naslijeđene zalihe. Plisiramo robu u 16 zemalja a ukupno 82% naše proizvodnje namijenjeno je izvozu. Vratili smo sve naslijeđene kredite i smanjili obaveze prema dobavljačima, trenutno smo firma koja dobro posluje, stabilni smo, imamo dobar trend, dobar pravac, nismo kreditno zaduženi. Prema naših 353 uposlenika nemamo dugovanja, planiramo nove investicije, obnavljanje postrojenja. U 2019. godini očekujemo još bolje poslovne rezultate”, rezime je vrlo naduhotog, inspirativnog i, za današnje privredne prilike u BiH, rijetko pozitivnog izvještaja koji je prezentovao Bakir Smailagić, direktor „Solana“ d.d. Tuzla.



Nova sjednica UO Komore donijela je razmatranje Izvještaja o radu, Izvještaja o rezultatima finansijsko-materijalnog poslovanja i Izvještaj Nadzornog odbora o uvidu u Finansijski izvještaj Kantonalne privredne komore Tuzla za period januar-december 2018. godine. Sva tri izvještaja, nakon analiza i pojašnjenja, usvojena su jednoglasno, što je također bio slučaj i na sjednici Skupštine Komore koja je održana krajem aprila a na kojoj su još donesene odluke o rasporedu viška prihoda po završnom računu za 2018. godinu te o naknadi za rad predsjednika i članova UO i NO Komore. Na trećoj u nizu sjednica UO Komore, donesena je Odluka o izmjenama i dopunama Poslovnika o radu Upravnog odbora te je jednoglasno i usvojen Poslovnik o radu Upravnog odbora Kantonalne privredne komore Tuzla. Najviše pažnje posvećeno je Informaciji o poslovnim aktivnostima u BH Telecom Sarajevo - Direkcija Tuzla. Sadik Džidić direktor Društva, sa svojim saradnicima je pripremio prezentaciju novosti iz BH Telecoma sa akcentom na aktivnosti vezane za 4G mrežu i unaprijeđeni sistem 4G+.



Pripremio: Dino Kalesić



BiH dobila 4G mrežu mobilnih komunikacija...

4G+ iz “BH Telecoma”

Nova USIM kartica umjesto stare SIM

Iskoristite promo akciju od 1. aprila do 1. juna 2019. godine i svoju SIM karticu BESPLATNO zamijenite novom, naprednijom USIM karticom.

Akcija je namijenjena:

- postojećim prepaid i postpaid korisnicima mobilne mreže BH Telecoma, te korisnicima postojećih Moj Combo i studentskih paketa, koji tokom akcije pređu na jedan od novih pretplatničkih extra mobilnih paketa BH Telecoma/ili na neki od novih paketa sa kombinovanim načinom plaćanja: Student NET, Student NET+ Combo NET, Teen i Assistan
 - novim pretplatnicima mobilne mreže BH Telecoma koji zasnuju pretplatnički odnos tokom akcije
 - korisnicima drugih mobilnih operatera koji prenesu broj u mrežu BH Telecoma tokom akcije
 - korisnicima Moj izbor/Top Tim/Biz izbor usluga koji podnesu zahtjev za zamjenu na USIM kartice
- USIM kartica vam omogućuje korištenje 4G mreže i veći kvalitet korištenja usluga BH Telecoma. Zahtjev za novu USIM karticu možete podnijeti na svim prodajnim mjestima BH Telecoma.

Moja priča.



Bosna i Hercegovina je dobila 4G mrežu mobilnih komunikacija. Posljednja država u Evropi prelazi na moderni sistem prijema i slanja sadržaja posredstvom mobitela kroz unaprijeđeni sistem 4G+. To znači da brzina prijema i slanja sadržaja može dostići čak i više od jednog gigabajta u sekundi. U odnosu na standardni 4G, to je deset puta više.

Uz to, verzija 4G koju uvodi „BH Telecom“ donosi i bitno manja odgađanja slanja saobraćaja nego kada se saobraćaj odvija standardnom 4G mrežom. Kašnjenja u odlasku i prijemu mjere se u mikrosekundama. Sarajevo je prvi grad u kojem će se 4G+ početi koristiti, a ubrzo će to iskusiti i Mostar, Tuzla i ostali gradovi u BiH. Do kraja godine, najmanje 60% BiH imat će pokrivenost signalom 4G Plus. “Tehnologija 4G+ omogućava istovremeno korištenje više kanala za komunikaciju mobilnog uređaja s baznom stanicom, pa korisnici ostvaruju nekoliko puta veće brzine od onih koje se postižu u standardnoj 4G mreži. Da bi bile iskorištene sve prednosti mreže 4G+, potrebno je imati 4G SIM karticu i telefon koji podržava ovu tehnologiju, kao i biti u zoni pokrivanja 4G+ signalom. Tehnologija koja se koristi da bi se omogućile još veće brzine i trenutno učitavanje sadržaja, kombiniraju dvije frekvencije s kojih se emitira signal mobilne telefonije”, pojašnjavaju iz „BH Telecoma“.

Kako je rečeno, „BH Telecom“ je spreman za zamjenu SIM kartica, za šta je potrebno najviše pet minuta na svakom od šaltera „BH Telecoma“ ta usluga se uradi gratis. “Poduzete su sve mjere kako ne bi bilo gužvi”, poručuju iz „BH Telecoma“. Uvođenjem 4G+ mreže, BiH je premostila dosadašnju zaostalost za ostalim evropskim državama, ali i došla korak bliže signalu 5G. Njega u ovom momentu koriste samo stanovnici Južne Koreje, koja je početkom ovog mjeseca pustila ovu vrstu usluge u široku upotrebu.

Prezentacija 4G+ BH Telecoma, na www.kpktz.ba

D.K.



Nove članice Komore...

U 2019. godini 12 novih članica za prva 4 mjeseca



KANTONALNA
PRIVREDNA
KOMORA TUZLA

Kada je u pitanju članstvo u Kantonalnoj privrednoj komori Tuzla, zadovoljstvo je istaći kako je u 2019. godini nastavljen trend povećanja broja članica. Velikom broju privrednih subjekata koje su potpisale članstvo u Komoru, za samo četiri mjeseca ove godine, pridružilo se njih još dvanaest. Riječ je o slijedećim firmama koje su se odmah po učlanjenju u Komoru, aktivno uključile u rad granskih udruženja te izjavile spremnost za sudjelovanje na sajamskim manifestacijama u okviru zajedničke sajamske postavke pod nazivom "Privreda TK". Sajamske aktivnosti će i u narednom periodu za svoje članice organizovati Kantonalna privredna komora Tuzla a zahvaljujući izuzetno kvalitetnim međukomorskim odnosima u zemlji i široj regiji te podršci Vlade Tuzlanskog kantona. Firme, nove članice Komore su „Plant“ doo Tuzla, „Rif Post“ doo Živinice, „Putnik“ doo Tuzla, „iDoor“ doo Tuzla, „Prec“ Živinice, „Lović&Co“ doo Bistarac Donji, „Radius“ doo Gračanica, Uni Bristol doo Hotel „Mellain“ Tuzla, „Mama Mia Origins“ Tuzla, „Yavuz company“ doo Srebrenik, JKP „Komemorativni centar“ doo Tuzla, „Asa osiguranje“ Tuzla.

Izdavanje ATA karneta...

Obračunski period 14.12.2018. – 24.04.2019. godine



U 2019. godini je nastavljeno izdavanje ATA karneta u Uredu Vanjskotrgovinske komore Bosne i Hercegovine u Tuzli pri Kantonalnoj privrednoj komori Tuzla. Podizanje dokumenata vrši se na mjestu gdje je zahtjev i podnesen. "Kada su u pitanju izdati ATA karneti i dodatni listovi u ovoj godini, dakle od 15.12.2018. do 24.04.2019., pristiglo je ukupno 130 zahtjeva. Od toga su bila 76 zahtjeva za izdavanje ATA karneta i 54 zahtjeva za izdavanje dodatnih listova za ATA karnet. Od 76 zahtjeva za izdavanje ATA karneta, 29 zahtjeva su podnijela fizička lica iz sljedećih opština: Kalesija, Zavidovići, Tuzla, Lukavac, Doboju Jug, Bijeljina, Živinice, Šekovići, Srebrenik, Tešanj, Milići, Ugljevik, Zvornik i Sapna, a 47 zahtjeva su podnijele firme iz Bijeljine, Gračanice, Gradačca, Lukavca, Živinica, Srebrenika, Bratunca, Tuzle, Usore, Kladnja, Sapne, Milića. Ukupno 43 fizička lica su podnijeli zahtjev za izdavanje dodatnih listova, a 11 zahtjeva stiglo je iz privrednih društava", izjavila je Edina Kanić Kurtić stručni saradnik za pravne, administrativne i opće poslove - Uredu za pružanje informacija o ATA sistemu i izdavanje ATA karneta Vanjskotrgovinske komore u Tuzli. Sve dodatne informacije, kao i potrebne upute o ATA sistemu i obrasce, zainteresirani mogu pronaći na web stranici Vanjskotrgovinske komore BiH www.komorabih.ba ili direktno – na osnovu dole navedenih kontakt informacija kao i u Uredu Vanjskotrgovinske komore Bosne i Hercegovine u Tuzli pri Kantonalnoj privrednoj komori Tuzla - Trg slobode bb – 75000 Tuzla - Tel/fax. +387/35/396-556 i Fax:+387/35/369-552, email: atatz@komorabih.ba - kontakt osoba: Edina Kanić Kurtić.



Prijavite se na B2B susrete sa privrednicima Vojvodine

Obavještavamo vas da Kantonalna privredna komora Tuzla i Privredna komora Vojvodine, organizuju B2B susrete, privrednika sa područja Tuzlanskog kantona i vojvodine, u četvrtak, 16. maja sa početkom u 12,00 sati u Privrednoj komori Vojvodine u Novom Sadu, ul. Hajduk Veljkova 11, Master centar Novi Sad.

Imajući u vidu da se sredinom maja održava Poljoprivredni sajam u Novom Sadu, da tradicionalno firme sa područja Tuzlanskog kantona organizuju posjete i izlaganje na ovom sajmu, bili smo slobodni upravo u tom periodu organizovati B2B susrete za naše članice. Smatramo ovaj događaj, koji će biti izuzetno dobro medijski praćen, izvanrednom prilikom za sticanje novih iskustava, proširenje saradnje, ostvarivanje novih kontakata. Spisak i profili preduzeća iz Vojvodine ćemo dostaviti naknadno, po formiranju spiska firmi sa područja Tuzlanskog kantona, učesnika B2B susreta u Novom sadu. Firme dolazak organizuju u vlastitoj režiji. U Privrednoj komori Novi Sad je potrebno biti do 11 sati i 30 minuta. Molimo sve zainteresovane firme članice Komore, da se u što kraćem roku prijave za učešće na B2B susretima. Prijave izvršiti na mail: dino@kpkpz.ba, mob: 061/164-311, kontakt osoba Dino Kalesić.

D.K.



Seminari, sastanci, razgovori...

Seminar o implementaciji FUK-a u FBiH

Održan drugi u ciklusu besplatnih jednodnevnih seminara o implementaciji FUK-a u Federaciji BiH

U ciklusu jednodnevnih besplatnih seminara na temu implementacija i problematika implementacije FUK-a održan je drugi u nizu seminara za javni sektor. Seminaru koji je održan u Kantonalnoj privrednoj komori Tuzla, prisustvovalo je 68 sudionika, od čega 11 rukovodilaca. Vrlo proaktivna atmosfera i prisutni rukovodioci pokazuju da je svijest o potrebi i obavezi Implementacije FUK-a u popriličnoj mjeri zaživjela



Ministar Puškar posjetio Komoru Tuzla

Održan sastanak o zajedničkim aktivnostima Ministarstva privrede TK i Kantonalne privredne komore



O dosadašnjoj saradnji i budućim zajedničkim aktivnostima Kantonalne privredne komore Tuzla i Ministarstva za privredu Tuzlanskog kantona, razgovarano je na sastanku u Komori. Nedret Kikanović predsjednik Kantonalne privredne komore Tuzla i Osman Puškar ministar za privredu Tuzlanskog kantona su na sastanku prisustvovali i njihovi najbliži saradnici, razgovarali o zajedničkim aktivnostima na unapređenju poduzetničke infrastrukture. Dogovorena je i zajednička posjeta općinama u drugim kantonima u

cilju razmjene iskustava po pitanju uspostave i uređenja poslovnih zona i drugih subjekata poduzetničke infrastrukture. Razgovaralo se i o podršci poduzetnicima, IPA projektima i INTERREG, kao i o modelu javno-privatnog partnerstva kao pozitivnom primjeru rješenja za smanjenje zloupotreba, korupcije kao i efikasnijeg dugoročnog rješavanja određenih vrsta javnih potreba u društvu. Tokom razgovora je istaknuta i potreba za dodatnim informisanjem i edukacijom poduzetnika sa područja Tuzlanskog kantona o dostupnim načinima finansiranja iz EU i drugih međunarodnih donatorskih fondova za finansiranje razvojnih projekata i investicija. S tim u vezi, dogovoreno je organizovanje seminara koji će omogućiti uvid u trenutno dostupne fondove za BiH, fondove za koje mogu aplicirati poduzetnici, načine pristupa navedenim fondovima, potrebnoj dokumentaciji, mogućnostima umrežavanja sa poduzetnicima iz regiona u svrhu zajedničkih aplikacija na fondove i slično. Dogovorene su i zajedničke aktivnosti na promociji poduzetništva i obrta u obrazovanju kroz planirane posjete školama u narednom periodu. Također, razgovaralo se i o parafiskalnim nametima i aktivnostima na poboljšanju poslovnog ambijenta u Tuzlanskom kantonu. Jedna od tema sastanka bila je i zajednički nastup Ministarstva privrede i Kantonalne privredne komore te poduzetnika članova Komore na Međunarodnom sajmu "Grapos expo" u Gračanici. Ovom prilikom iskazano je zadovoljstvo po pitanju dosadašnje saradnje Ministarstva privrede i Kantonalne privredne komore Tuzla, te je dogovoren i nastavak uspješne realizacije aktivnosti u skladu sa Sporazumom o partnerskoj saradnji.

Pripremila: Edina Kurtić
Rukovodilac Sektora udruženja KPK Tuzla



Seminari, sastanci, razgovori...

Razgovor o uređenju zakonskog okvira poduzetničke infrastrukture

Sastanak na temu unapređenja poduzetničke infrastrukture po pitanju zakonskog okvira u Općini Tešanj



Radno-konsultativni sastanak predstavnika Ministarstva privrede Tuzlanskog kantona i Kantonalne privredne komore Tuzla sa predstavnicima općinskih službi za privredu, urbanizam i imovinsko-pravne odnose, održan je u Tešnju. Sastanku je prisustvovao i Suad Huskić načelnik općine Tešanj. Tema sastanka je bila razmjena iskustava i pozitivne prakse na uređenju zakonskog okvira poduzetničke infrastrukture i poslovnih zona. Na sastanku je bilo riječi o konkretnim aktivnostima koje provode općinske službe na uređenju poslovnih zona od uspostave do upravljanja te ostalim podsticajnim aktivnostima za unapređenje poslovnog ambijenta i privlačenje investitora na području ove općine. Nakon konkretne razmjene iskustava po pitanju zakonskih okvira za poslovne zone učesnici sastanka su imali priliku da zajedno prođu kroz poslovne zone Bukva, Ciglane i Glinište te se na licu mjesta uvjere u konkretne projektne aktivnosti koje provodi Općina Tešanj na poboljšanju uslova za poslovanje poduzetnika u okviru navedenih poslovnih zona.

Delegacija Privredne komore Indonezije u Komori Tuzla



Kantonalnu privrednu komoru Tuzla je posjetila delegacija komore Indonezije koja ovih dana boravi u posjeti Bosni i Hercegovini. Nedret Kikanović predsjednik Kantonalne privredne komore Tuzla sa svojim najbližim saradnicima, primio je u službeno posjetu dr Yunni Indrani W.SE. iz Privredne komore Indonezija. Tokom srdačnog razgovora iskoristio se predsjednik Kikanović prilikom da uvažnoj gošći predoči strukturu privrede Tuzlanskog kantona. Bilo je razgovora i o trendovima vanjskotrgovinske razmjene između Indonezije i Bosne i Hercegovine, načinima na koje se saradnja može unaprijediti u narednom periodu, te mogućnostima i realnim potrebama uključenja privrednih komora u jačanje privrednih odnosa. Gospđa Yunni se interesovala za mogućnost

organizovanja poslovnih susreta i prezentacije privrede i projekata naše zemlje u Indoneziji. Imajući u vidu da je boravak gospođe Yunni u Bosni i Hercegovini usko povezan sa njenim učešćem na Festivalu savremene žene, razgovarano je i o prisustvu žena u privredi kao i značaju edukacije i promocije poduzetništva među mladim ženama, s ciljem pokretanja sopstvenog biznisa. Na kraju ugodne posjete, obje strane su uz izraze zadovoljstva zbog upriličenog susreta, izrazile spremnost za daljnjim nastavkom saradnje.

Pripremila: Edina Kurtić
Rukovodilac Sektora udruženja KPK Tuzla



Posjeta delegacije GIZ-a...

„Inovacije i digitalizacija u malim i srednjim preduzećima u BiH“

Obezbijediti veći obim informacija o digitalnoj transformaciji i približiti proces firmama



„Inovacije i digitalizacija u malim i srednjim preduzećima u BiH“ naziv je projekta čiju realizaciju je pokrenuo GIZ. S ciljem prezentacije aktivnosti ovog projekta, menadžer projekta Karin Rau i viši savjetnik Donald Prohaska posjetili su Kantonalnu privrednu komoru Tuzla i razgovarali sa Nedretom Kikanovićem, predsjednikom Komore i njegovim saradnicima. Kako je istaknuto na sastanku, cilj projekta koji će obuhvatiti sve općine na području Bosne i Hercegovine u periodu od 2,5 godine, jeste pružiti podršku inovacijama u malim i srednjim preduzećima kroz primjenu digitalne tehnologije. „Kroz projekat se želi obezbijediti veći obim informacija o digitalnoj transformaciji i približiti ovaj proces firmama, kao i uspostaviti saradnju između domaćih IT firmi i malih i srednjih preduzeća iz ostalih sektora, radi pronalaska optimalnih digitalnih rješenja za unapređenje njihovog poslovanja. Jedan od zadataka je i zajedno sa institucijama raditi na

okvirnim politikama i uspostavi platforme sa relevantnim temama za proces digitalizacije u MSP“, istakli su gosti iz GIZ-a. Kako je naglašeno, na području Tuzlanskog kantona, u realizaciju projekta će biti uključene Komora, BIT Centar, Nerda i Univerzitet u Tuzli, te će zajedno potpisati memorandum o saradnji na realizaciji projekta s GIZ-om. „Kantonalna privredna komora Tuzla će u početnoj fazi sagledati trenutno stanje u malim i srednjim preduzećima kada je u pitanju digitalna transformacija, a početkom juna ćemo organizovati prezentaciju projekta, gdje će se privrednici upoznati sa aktivnostima ali i pozitivnim praksama i iskustvima firmi koje su uspješne u realizaciji ovog procesa“, istakao je na kraju sastanka Nedret Kikanović predsjednik Kantonalne privredne komore Tuzla.

“Promocija poduzetništva i obrtništva u obrazovnim institucijama”

Predstavljane pozitivne priče uspješnih poduzetnika i obrtnika



Delegacija Kantonalne privredne komore Tuzla je tokom nekoliko sedmica u aprilu zajedno sa predstavnicima Ministarstva za privredu Tuzlanskog kantona, sačinjavala tim koji je radio na realizaciji aktivnosti vezanih za promociju poduzetništva i pokretanje biznisa. Cilj projekta koji je nosio naziv “Promocija poduzetništva i obrtništva u obrazovnim

institucijama” a u koji su bili uključeni školarci iz nekoliko škola, bio je promocija poduzetništva i obrta i jačanje saradnje sa obrazovnim i privrednim sektorom. U saradnji sa partnerskim institucijama Kantonalnom privrednom komorom Tuzla, Obrtničkom komorom Tuzlanskog kantona, Pedagoškim zavodom TK, Centrom za razvoj poduzetništva Tuzla, BIT Centrom Tuzla, Fondacijom Tuzlanske zajednice, Institutom za zavarivanje d.o.o. Tuzla i predstavnicima nadležnih općinskih službi i poduzetnicima i obrtnicima sa Tuzlanskog kantona, organizovano je održavanje školskog časa u osnovnim i srednjim školama, kao i fakultetima, pri čemu su predstavljane pozitivne priče uspješnih poduzetnika i obrtnika a omogućene su i posjete učenika kompanijama. Promotivne aktivnosti su ujedno bile usmjerene na jačanje partnerskih odnosa između sektora obrazovanja i poduzetnika, promociju kulture poduzetništva kod učenika, a sve s ciljem jačanja poduzetničkog duha među mladom populacijom i promjenom njihovog načina razmišljanja o pokretanju vlastitog biznisa.

D.K.



Iz Udruženja za trgovinu, ugostiteljstvo i turizam...

Održana redovna sjednica Odbora Udruženja

Razmatrana aktuelna problematika u oblasti trgovine, ugostiteljstva i turizma –
Prestavljene aktivnosti vezane za 17. sajam "List", međunarodni sajam turizma i ekologije

Na Dnevnom redu i ovoga puta je bila aktuelna problematika u oblasti trgovine, ugostiteljstva i turizma, sa akcentom na brobu protiv sive ekonomije. Još jednom je naglašena neophodnost uključenja svih relevantnih institucija i ustanova i rješavanje ovog velikog i dugogodišnjeg problema a sve s ciljem stvaranja što povoljnijeg poslovnog okruženja na području Tuzlanskog kantona.



U središtu zanimanja članova Odbora Udruženja za trgovinu, ugostiteljstvo i turizam Kantonalne privredne komore Tuzla, bio je predstojeći 17. sajam "List", međunarodni sajam turizma i ekologije koji se od 9. do 11. maja održava u Lukavcu. Istaknuto je na ovom sastanku da će Lukavac i ove godine biti domaćin jedne od najznačajnijih sajamskih manifestacija u našoj zemlji, i da se s ponosom ističe da je to 17. po redu sajam turizma i ekologije LIST, bez prekida i svake godine sve veći i bolji. **"Bosanskohercegovački izlagači će predstaviti turistički potencijal naše zemlje, autohtonu bosansku kuhinju i brojne znamenitosti ovoga kraja i države. Izlagači i drugi dragi gosti iz inostranstva će pokazati dio svojih kultura i prirodnih bogatstava, te na Sajmu razmijeniti iskustva i saznanja koja će doprinijeti razvoju turizma uopće, a to ima višestruki značaj za sve nas"**, rekao je Izet Nuhanović, direktor LIST-a. Nuhanović je izrazio zadovoljstvo što broj izlagača i drugih učesnika raste iz godine u godinu, a i broj posjetilaca redovno obara rekorde. To je motiv za kontinuiran rad na poboljšanju ponude, posebno kada su u pitanju prateći stručni, kulturni, sportski i zabavni sadržaji. **"Tokom tri dana planirali smo realizovati dvadesetak manifestacija, a osim stručnih skupova i poslovnih susreta, izdvojio bih i neke od masovnijih kao što su: Regionalno takmičenje turističko-ugostiteljskih škola "Oni dolaze", Festival hrane i pića "Bosanska sofa", Finalni izbor "Miss mature 2019", Sajamsku biciklijadu, Novinarsku kotlićijadu i koncert najveće zvijezde narodne muzike u regiji"**, kaže Nuhanović.



**LUKAVAČKI SAJAM
TURIZMA I EKOLOGIJE "LIST"
09.-11.maj 2019.
www.lukavacki-sajam.com**

Jedna od novina koja će zasigurno privući pažnju je realizacija projekta "Golfom kroz region", koji vodi Turistička organizacija Opštine Žabalj, u saradnji sa Golf klub Centrom iz Žablja, a koji se realizuje u gradovima regiona: Tivat, Herceg Novi, Zagreb, Lukavac – Tuzla, Ljubljana, Temišvar, Mostar, Banja Luka i Osijek. Kroz demonstrativne časove golfa koji će biti davani u sklopu ovog projekta, a u vrijeme održavanja Sajma LIST u Lukavcu, svi zainteresovani moći će po prvi put da se oprobaju u ovom sportu, uz zabavu i opušteno druženje. 17. Međunarodni sajam turizma i ekologije LIST će biti organizovan u saradnji sa Općinom Lukavac i Turističkom zajednicom Tuzlanskog kantona, a uz podršku Vlade TK i Ministarstva trgovine, turizma i saobraćaja TK. Ovogodišnji prijatelji manifestacije su Privredna komora FBiH, Turistička organizacija Ulcinj (Crna Gora) i Turistička organizacija Žabalj (Srbija – Vojvodina).

D.K.



Iz Udruženja za poljoprivredu i prehrambenu industriju...

Organizovan informativni skup za podnosiocima prijave za dodjelu bespovratnih sredstava od USAID/Sweden FARMA II



Udruženje za poljoprivredu i prehrambenu industriju Kantonalne privredne komore Tuzla organizovalo je informativni skup za potencijalne podnosiocima prijave za dodjelu bespovratnih sredstava od USAID/Sweden FARMA II za pružanje usluga obuke, savjetodavne podrške i druge stručne podrške organizacijama proizvođača iz sektora poljoprivrede. Kako je istaknuto na ovom skupu, jedna od glavnih pokretačkih snaga koje su neophodne za podsticanje održivog razvoja i rasta poljoprivredno-prehrambenog sektora u BiH je efikasan i integrisan sistem i mreža savjetodavne podrške i usluga poslovnog razvoja. Na osnovu procjene koju je početkom 2017. godine uradio projekat FARMA II, omjer savjetodavac/farmer u Bosni i Hercegovini je oko 1 na 900, dok u zemljama Evropske unije (EU) broj poljoprivrednih proizvođača na jednog savjetodavca iznosi od 50 do 90. Postoji nedostatak namjenskih programa ili podrške koji bi

potakli ekspanziju, nudili specijalizovane profesionalne savjetodavne usluge na organizovan, integrisan i sistematičan način. Svrha ovog Poziva je da se pruži podrška registrovanim poljoprivrednim proizvođačima, preduzetnicima, zadrugama, udruženjima i preduzećima u ostvarivanju lakšeg pristupa visokokvalitetnim savjetodavnim i/ili poslovnim uslugama, što će kao rezultat imati bolje poslovne rezultate, doprinijeti razvoju ljudskog i fizičkog kapitala, povećati uspješnost poljoprivrednog sektora da se nosi sa konkurentnim i tržišnim snagama, kao i da se postigne postepeno usklađivanje sa standardima EU, uz istovremeno ostvarivanje ekonomskih, socijalnih i ekoloških ciljeva u ruralnim područjima BiH. Ova aktivnost se odnosi na ciljne sektore projekta FARMA II, i to sektora mljekarstva, voća i povrća, ljekovitog bilje, meda i peradarstva, rečeno je na Informativnom skupu u Kantonalnoj privrednoj komori Tuzla.

Susret partnera projekta "INNOVET"



Susret partnera projekta "INNOVET", finansiranog iz evropskog fonda Erasmus plus, organizovan je u okviru redovnih aktivnosti Udruženja za poljoprivredu i prehrambenu industriju Kantonalne privredne komore Tuzla. Porodični ruralni edukativni centar-PREC Živinice, je partner u projektu "INNOVET" finansiranog iz evropskog fonda Erasmus plus. U okviru ovog projekta organizovano je nekoliko studijskih posjeta i susreta u zemljama članicama organizacija ovog projekta, poput Francuske, Islanda, Belgije, Rumunije, Litvanije i Slovenije, naglašeno je na ovom susretu.

Kako je istaknuto, ovim povodom planirano je nekoliko susreta Međunarodnih organizacija sa lokalnim akterima teritorije u cilju upoznavanja konteksta BiH, TK i mreže PREC-ova u BiH, razmjeni iskustava i pravljenja radnih /strateških dokumenata za razvoj ruralne teritorije prije svega kroz edukacije i umrežavanje, kao i mogućnost rada na budućim evropskim projektima. Na prvom sastanku u BiH, članica organizacija projekta "INNOVET", mogućnost učešća su dobili predstavnici općina/opština Srebrenik, Kladanj, Bratunac, Zvornik, Banovići i Živinice, koji rade na projektima, strateškom razvoju, privredi i sl. Ovakvi susretu su prilika da se svi učesnici iz BiH predstave i kažu iz svog ugla, tj. organizacije iz koje dolaze, na kojim tačkama rade, sa kojim snagama i poteškoćama se susreću u cilju izgradnje teritorije, prije svega fokus je na ruralnu teritoriju, te koja bi vrsta saradnje, podrške bila potrebna da se njihovi projekti/poduhvati pospješe, na sastanku je izjavio Suad Selimović sekretar Udruženja za poljoprivredu i prehrambenu industriju Kantonalne privredne komore Tuzla.

D.K.



Predstavljamo nove članice Komore...

Kompleks „Mellain“ Tuzla

Mellain Hotel Decentni Dodir Luksuza



Hotel Mellain se nalazi u sklopu poslovnog, stambenog, turističkog i lječilišno-rehabilitacionog kompleksa „Mellain“ u srcu Tuzle na jednoj od najatraktivnijih i najpoželjnijih lokacija kako za življenje tako i za hotelske usluge, liječenje, poslovanje i kupovinu. Moderan, u BiH jedinstven, ovaj stambeno-poslovni kompleks, okružen zelenilom i drvoredima, u regionu i šire pomjera granice u domenu arhitekture i koncepta modernog življenja sa decentnim dodir urbanog luksuza. Prestižna lokacija, izvanredno arhitektonsko rješenje i multifunkcionalnost su njegove glavne osobenosti. Mellain kompleks svojom bogatom ponudom, izgledom i sadržajima oplemenjuje život Tuzle i šireg regiona. Mellain Hotel Tuzla jedan je od najprestižnijih hotela u Bosni i Hercegovini. Primjenjeni koncept sklada, elegancije i stila ogleda se u luksuzno opremljenim, prostranim sobama i apartmanima, elegantnoj i moderno opremljenoj kongresnoj dvorani, te vrhunskim restoranima i kafeima sa panoramskim pogledima na grad. Preljepi ambijent i udobnost hotela uz atraktivnu spa&wellness ponudu čine ga idealnim odredištem za nezaboravan boravak u Tuzli i BiH.



Mellain Hotel raspolaže sa 111 soba, 15 luksuznih apartmana, jednim de lukse apartmanom kao i sobom za invalide. Apartmani sa decentnim dodir luksuza se sastoje od odvojenog dnevnog boravka i spavaće sobe. Stilski namještaj, prostrane kupaonice i umjetnička djela čine ovaj prostor dostojnim reprezentom Mellain Hotela. Sve sobe imaju jedinstven pogled na grad Tuzlu, jedan od najstarijih grado-va u Evropi. Predivan ambijent i ugodna atmosfera učini će da se osjećate posebno i nezaboravno. Sve sobe su opremljene TV aparatima ravnog ekrana s kablovskim programima, prostorom za sjedenje i opuštanje. Klimatizirane su te uključuju vlastitu kupaonicu i kozmetički pribor. Gostima su na raspolaganju wi-fi, ogrtači i papuče, sef, minibar. Posjetiocima i gostima hotela, na raspolaganju su CAFE & Restoran, Café Vidikovac, Restoran Galerija, Lobby Bar, Café Slastičarna. Svi gosti i posjetioci mogu uživati u gastronomskim delicijama prestižnih kuhara hotela. Bogata i inovativna ponuda internacionalne i mediteranske kuhinje ne ostavlja nikoga ravnodušnim. Café bar Vidikovac na 20. spratu hotela pruža zadivljujući pogled na grad, opuštajuće trenutke i poseban ugođaj. Veoma moderan enterijer sa bojama koje opuštaju doprinose maksimalnom uživanju u vremenu i prostoru. Ukoliko želite poseban doživljaj, mirisnu kafu sa pogledom na Tuzlu, ekskluzivan ambijent sa modernim duhom onda je Kaffe Vidikovac izbor za Vas.

Restoran Galerija izgledom je spoj kultura: Zapad, istočna Evropa i sjeverna Azija. Ugodan i miran ambijent, atraktivan izgled, ljubazno osoblje i vrhunski specijaliteti razlog su da poslovni, porodični ili bilo koji drugi ručak ili večeru provedete u Restoranu Galerija Mellain Hotela. Restoran Galerija sa ponosom može primiti preko 300 gostiju, kako za kongrese,



manje ili veće proslave, tako i za poslovna i porodična druženja. U samom nastavku restorana, nalazi se i VIP sala, koja je idealna za radne sastanke, predavanja, ali i za organizovanje posebnih i specifičnih zahtjeva gostiju i slobodnih prolaznika. Vip sala Vašu večeru ili ručak diže na viši nivo, a Vašem predavanju i poslovanju daje poseban značaj. Činjenica da se ispred restorana nalazi veliko predvorje opremljeno opet u duhu Evrope i Azije te veliki garderober, svrstava ovaj prestižni restoran na sam vrh ljestvice kada su u pitanju hotelijerstvo i ugostiteljstvo. Lobby Bar i Cafe slastičarna Mellain Hotela predstavljaju raskrnicu svih dijelova ovog jedinstvenog kompleksa. Izgledom elegantne, duhom vesele, mjesto su u kojem možete uživati u čaju, kafi ili omiljenom piću. Mjesto su gdje možete vidjeti ljude iz svih dijelova svijeta i ujedno uživati u bredniranim i jedinstvenim Mellain tortama i kolačima koji se pripremaju sa ljubavlju i sa odabranim sastojcima. Mellain Hotel posjeduje luksuzno i elegantno dizajniranu kongresnu dvoranu sa 440 mjesta, uz opremu vrhunske tehnologije (Kongresna pozornica, HD projektor sa ugradbenim platnom, Oprema za bežično ozvučenje, Prilagodljiva svečana svjetla, lampe i LED rasvjeta). Prikladna je za organizaciju najzahtjevnijih kongresa, konferencija, seminara, simpozija, i svih drugih sastanaka i događaja. Uz mogućnost pregrađivanja dvorane na tri manje sale na raspolaganju su i manje VIP sale za sastanke. Organizaciju Vaših najljepših i najvažnijih trenutaka možete povjeriti timu Mellain Hotela koji će se maksimalno angažovati i profesionalno posvetiti svakom događaju. Specijalno dizajniran bazen na 19. spratu Mellain Hotela istinska je oaza za Vaš odmor i relaksaciju. Izdvajamo bazen sa hidro prskalicom, saunu, moderan fitness centar i teretanu, ležaljke, tuševe, mogućnost rezerviranja masaža i tretmana.



Relaksirajuća, ugodna atmos-fera harmonizira energiju tijela i duha. U našem centru za odmor i relaksaciju opustit ćete tijelo i um od stresa, uživajući u predivnom pogledu na okolne planinske vrhove, kao i svim drugim blagodatima koje nudimo. Pored vrhunske opreme u fitness centru, ljubazno osoblje će Vam pomoći u pripremi-nom procesu za Vaš trening, nakon čega možete koristiti usluge saune sa pogledom na grad Tuzlu. Veliki stakleni zidovi obezbjeđuju prirodno svjetlo, što omogućava ugodno vježbanje i relaksaciju te daje osjećaj treninga na otvorenom.



INFORMACIJE I REZERVACIJE
Hotel Mellain
Aleja Alije Izetbegovića 3
75 000 Tuzla
Bosna i Hercegovina
t: +387 35 365 500
f: +387 35 278 256
e: info@mellainhotel.com
w: www.mellainhotel.com

Dobro došli u Hotel Mellain!



Predstavljamo nove članice Komore...

“Radius” doo Gračanica

Uposleni doo Radius jako su zadovoljni sistemom nagrađivanja u svojoj firmi i motivacijskim tehnikama



Firma “Radius” doo je osnovana 2000. godine. Sjedište firme se nalazi u Gračanici, BiH i smješteno je u industrijskoj zoni na glavnom putu Gračanica –Tuzla. Osnovna djelatnost firme Radius je trgovina građevinskim materijalom na veliko i malo. U ponudi Radius-a također se može naći širok asortiman bijele i crne tehnike, malih kućanskih aparata, te bogata ponuda građevinskih mašina. Kao specijalnu ponudu Radiusa ističemo posredovanje u prodaji nekretnina i automobila. Firma posluje na 15.000,00 m² otvorenog stovarišnog prostora, 3500,00 m² zatvorenog prostora uređenog po evropskom standardu. Uprava firme i maloprodaja sa luksuzno uređenim salonom sanitarne opreme i keramike nalazi se u modernom, novoizgrađenom objektu na preko 1500,00 m² prostora.

Firma Radius doo poslovanje je započela sa 5 zaposlenih radnika. Zahvaljujući požrtvovanosti osnivača i generalnog menadžera firme dipl.ecc. Hasana Sarajlića, te svih uposlenih Radius-a firma je u periodu od 2000-te do kraja 2009-te godine doživjela veliki uspjeh, te sada broji 30 uposlenih. Jedan od najbitnijih razloga zbog kojih je ova firma i napravila veliki uspjeh je taj što su se uposleni kao i menadžment firme uvijek borili za dobrobit klijenta, kvalitetu usluge i proizvoda, te obezbjeđenje što lakšeg načina plaćanja za kupce putem obročne pretplate. Na taj način svim našim kupcima bez obzira na imovinsko stanje omogućeno je da osiguraju sebi isvojju porodici bolji i kvalitetniji život u toplinu sigurnog doma.



Osim vrlo povoljnih uslova kupovine, kvaliteta usluge i proizvoda, naša firma posjeduje vozni park od 15 dostavnih vozila koji vrše BESPLATNU DOSTAVU za širo gradsko područje. Naši vozači uvijek su spremni pomoći kupcima prilikom utovara i istovara materijala, te porudžbinu dostaviti na vrijeme. Svoju brzinu dostave i ljubaznost uposlenih u voznom parku koristimo kao moćno oružje kod osvajanja novih kupaca. Robu sa našeg stovarišta brzo i efikasno prevozimo našim vozilima do vašeg gradilišta ili objekta u vrijeme i po dinamici koja vama najviše odgovara. Veličina našeg stovarišta 28.500,00 m², koje planiramo i dalje širiti omogućava nam da svojim klijentima možemo ponuditi veliki izbor robe sa velikim količinama, što našim partnerima građevinskim firmama obezbjeđuje siguran lager i potvrđuje tezu «uvijek sve na jednom mjestu». Proizvodi u našoj ponudi su iz paleta renomiranih svjetski priznatih proizvođača što jasno govori o kvaliteti naše ponude. Isti su

sačinjeni od izvrsnog osnovnog materijala, sa garancijom proizvođača od kojih velika većina posjeduje ISO klasifikaciju čiji je kvalitet rada provjeren kroz višegodišnju međunarodnu upotrebu. Za sve navedeno postoje dozvole za promet prodaje, atesti i svjedodžbe o kvaliteti.

Redovno radimo na stručnom usavršavanju našeg prodajnog tima, kako bismo svojim klijentima pored neizostavne ljubaznosti, brzine i kvaliteta usluge, mogli ponuditi i tehničko savjetovanje klijentima prilikom kupovine. Naši kupci kod nas dobijaju uvijek vrijednost više, a mi se trudimo osigurati im da se u našim prostorijama osjećaju kao dragi radoviđeni gosti. Proteklih godina uspjeli smo izgraditi izgraditi imidž poštene firme u koju je svako sa dobrim i poštenim namjerama dobrodošao. Zahvaljujući dobroj organizaciji, postavljenom sistemu kontrole kvalitete, te kontrole protoka roba i dokumentacija naši klijenti uvijek dobijaju tačne količine roba i svu opremu u izvrsnom stanju.



Uposleni doo Radius jako su zadovoljni sistemom nagrađivanja u svojoj firmi i motivacijskim tehnikama koje se u našoj firmi primjenjuju. Česta kolektivna druženja pomažu nam da se naši uposleni što bolje privatno upoznaju i povežu, a sa ciljem što boljeg razumijevanja, razvoja timskog rada i tolerancije. Na taj način zajedničkim snagama uspijevamo da ispunimo sva planiranja, te udovoljimo svim zahtjevima kupaca, a što ćemo svakako činiti i dalje

RAČUNAJTE NA NAS!!!
„Radius“ doo Gračanica

D.K.



Predstavljamo nove članice Komore...

Lović & Co Lukavac

“Ponosimo se zadovoljstvom naših kupaca” - “Godine rada ostavile su za sobom zadovoljne poslovne partnere i sradnike” - “Ponosni smo na priznanja koja smo dobili od naših klijenata, za stručnost, odanost i spremnost da pomognemo...” - “Za nas je svaki naš klijent jedinstven...” - “Posvećenost zadovoljstvu naših klijenata, prioritet”

Lović & Co je porodična kompanija osnovana 1976 godine u B. Dubici, a od 1996 godine sjedište kompanije je u Lukavcu. Naši mnogobrojni kupci prepoznali su nas kao jedinstvene proizvođače krovnih sistema za odvodnju oborinskih voda sa krova. Široka paleta boja, tehnika jednostavnog montiranja, vrlo kratak rok isporuke i mogućnost dostave, daju veliku garanciju pri kupnji građevinske limarije.... U izradi svih proizvoda posjedujemo dokazano iskustvo. Proizvodimo trapezne limove, limove imitacije crijepa, kompletnu limarsku galanteriju, strujne, hidrantske, poštanske i gardarobne ormare kako i razvodne ormare za grijanje. Svi naši proizvodi odlikuju se potvrđenom kvalitetom.

Proizvodni pogon je smješten na 6000 m² koji obuhvata nekoliko proizvodnih objekata koji su opremljeni savremenom tehnologijom i mašinama što nam uz našu iskusnu i kvalificiranu radnu snagu omogućuje da odgovorimo na sve zahtjeve tržišta. Posluje sa preko 300 građevinskih i drugih firmi širom BiH kao i sa firmama iz susjednih zemalja. Težimo stalnom usavršavanju i modernizaciji našeg poslovanja uz primjenu savremenih procesa obrade i proizvodnje svih vrsta limova. Lović&Co d.o.o., jedna je od firmi koja bilježi uspješan rast i razvoj. Vizija firme Lović&Co d.o.o. je biti moderna, fleksibilna, učinkovita i inovativna firma koja je poznata po kvalitetu svojih proizvoda, profesionalnim pristupom, te zadovoljstvu naših klijenata. Gradimo, razvijamo i unapređujemo dugoročne odnose s našim klijentima i potrošačima – brzo, kvalitetno i pouzdano udovoljavamo svim zahtjevima i sve što radimo posvećeno je zadovoljstvu naših klijenata. Naši zaposlenici ključ su našeg uspjeha! Lović&Co d.o.o. podržava saradnju i timski rad na svim razinama u cilju izmjene znanja, iskustva i pronalazjenja najnovijih poslovnih rješenja. Firma potiče kodeks etike u poslovanju.



Kvalitet prije svega!

Imajući u vidu da naši kupci pored brze usluge i konkurentne cijene žele i kvalitetan proizvod, nabavili smo najsavremenije mašine za obradu lima, ali i stalno obučavamo i školujemo naše zaposlene, te nastojimo da se interes našeg kupca ispoštuje u svakom segmentu. Pri proizvodnji koristimo uvozne materijale garantirane kvalitete koji udovoljavaju svim normama.

Proizvodnja

Proizvodnju limarskih proizvoda smo bazirali na uspješnom dugogodišnjem iskustvu u montaži lima u obliku crijepa, trapeznih limova te građevinske limarije. Naši zaposlenici su zbog toga u mogućnosti ne samo ispuniti sve Vaše zahtjeve,

već po potrebi odgovoriti i na sva Vaša pitanja i nedoumice, te pomoći savjetom i na taj način zajednički doći do rješenja.



Prodaja lima

Vršimo uslugu prodaje lima sa ili bez dostave. Manje količine se računaju po m² a veće količine lima prodaje se po kilogramu. Standardne boje koje uvijek imaju na raspolaganju su: RAL 8019, RAL 9002, RAL 9010, RAL 9006, RAL 3009, POCINČANI LIM. Razvijene širine lima su: 16 cm, 20cm, 25cm, 33cm, 41 cm, 50cm, 62.5cm, 100 cm i 120 cm. Uz prodane limove posjedujemo ateste i certifikate od renomiranih firmi Archelor Mitall Njemačka i Marchegaglia Italija.



Montaža profilisanih limova i limarske galanterije

Pored proizvodnje, naša firma, brzo precizno i kvalitetno vrši usluge montaže svih naših proizvoda. Prilikom izvođenja radova firma se oslanja na vlastite resurse kako bi se osigurala visoka kvaliteta usluge. Montažu izvođe obučeni i kvalificirani radnici koji su spremni odgovoriti na sve izazove koji su pred njima i tako vaš objekat učiniti ljepšim i funkcionalnijim. Stručno osoblje čine profesionalci, koji svojim znanjem i iskustvom uspješno izvođe i najzahtjevnije zadatke.

Naše prednosti su naša najbolja preporuka:

Isporuka na vrijeme - Sve isporuke vršimo na vrijeme i po dogovoru!

Kvalitet - Brendirani dobavljači, kvalitetna sirovina, kvalificirana radna snaga, moderna tehnologija...Kvalitetan proizvod!

Online trgovina - Putem našeg Web Shopa, klijenti su u mogućnosti online izvršiti narudžbu.

Lokacija - Nalazimo se uz putne komunikacije sa urednim prilazom firmi: Adresa: Donji Bistarac bb, Lukavac 75300, BiH.

Kontaktirajte nas:
Email - lovic.steel@gmail.com
Telefon: +387 35 541 110
Fax: +387 35 369 714

D.K.



Iz Grupacije za mlijeko...

„U Tuzlanskom kantonu zbog smanjenja poticaja za mlijeko gase se farme“



Suad Selimović sekretar Udruženja za poljoprivredu i prehrambenu industriju Kantonalne privredne komore Tuzla upozorio je da ukoliko dođe do smanjenja poticaja za mlijeko u Federaciji BiH, da će to dovesti do novog vala iseljavanja stanovništva. „Ovo je nastavak strategije tjeranja stanovništva iz BiH, pogotovo iz ruralnih područja. Vođenje ovakve poticajne politike u poljoprivredi jeste realizovanje plana iseljavanja ljudi. Jer smanjiti poticaje kako je to urađeno proizvođačima mlijeka, nije uredu“, rekao je Selimović. Podsjetio je na činjenicu da je mljekarstvo osovina u poljoprivrednoj proizvodnji i da su poljoprivredna zemljišta i svi

resursi prilagođeni stočarskoj proizvodnji. „Međutim, mi vidimo da ovakva poljoprivredna politika ne ide u cilju podrške proizvodnje. Također, nisu ispoštovani federalni zakoni o novčanim poticajima. Zatim, ovo sve ukazuje i na dug od 850 hiljada KM od tužbi koje su pristigle za naplatu, a koje su stavljene u poticaje za 2019. godinu. I dugovi proizvodnje iz prošle godine su stavljeni u poticaje za 2019. godinu. Mi smo poticaje za 2019. godinu smanjili za skoro 10 miliona KM. Ovo nije nikakav poticaj za razvoj nego može biti samo jedno veliko razočarenje za poljoprivrednike da one proizvodnje koje su već postigli sada zaustave“, pojasnio je Selimović. Upozorio je da već dolazi do gašenja farmi i smanjenja proizvodnje mlijeka. „Dosta je toga već smanjeno, a ono što je najveći problem što su djeca roditelja koji su osnovali farme već napustila te farme i rade u zemljama Evropske unije“, naglašava i dodaje kako su u prošloj godini poticaji po litru mlijeka iznosili 28 feninga, a novim pravilnikom to bi bilo 25 feninga. „Imamo jako velik uvoz svježeg mlijeka. S druge strane u prošloj godini u Tuzlanskom kantonu poljoprivrednici su morali smanjiti proizvodnju mlijeka za skoro milion i pol litara. Sigurno da će taj pad biti još veći i ove godine“, kaže na kraju razgovora za Fenu sekretar Udruženja za poljoprivredu i prehrambenu industriju Kantonalne privredne komore Tuzla Suad Selimović.

Uskoro velika konferencija...

IT, biznis, marketing, ideje

IT, biznis, marketing, ideje – sve na jednom mjestu i najvećoj konferenciji do sada



Kako doznajemo, u septembru će Tuzla i Lukavac po prvi puta biti centar okupljanja do sada najveće IT konferencije u Bosni i Hercegovini. Za sada nam je poznato da se konferencija održava na jezeru Modrac a predavači na konferenciji su najveći regionalni stručnjaci iz IT-a i digitalnog marketinga, kao i predavači iz biznisa - real stories. Nezvanične informacije su da se očekuje više od 500 učesnika među kojima će biti i predstavnici nekih od najvećih tehnoloških divova kao što su Microsoft, Lenovo, Google, Kaspersky LAB a jedan od organizatora same konferencije je i kompanija IMEL. Pratite nas i više informacija uskoro...

D.K.



Privreda TK u Beogradu...

Održan 45. sajam građevine SEEBBE 2019 Beograd

„Gradimo budućnost zajedno“

Na Beogradskom sajmu je održan “45. Međunarodni sajam građevinarstva SEEBBE 2019” pod sloganom „Gradimo budućnost zajedno“. Tokom četiri dana trajanja u okviru šest hala (1, 1A, 2, 3, 3A i 4) kao i na otvorenom prostoru, predstavilo se više od 600 izlagača iz 27 zemalja. Manifestaciju je otvorila Aleksandra Damnjanović, državni sekretar u Ministarstvu građevinarstva, saobraćaja i infrastrukture i tom prilikom izjavila da je u sektoru građevinarstva sproveden niz reformi, kao i da je u ovom trenutku u Srbiji aktivno preko četrdeset hiljada gradilišta.



Učešće na ovoj manifestaciji uzele su mnoge kompanije iz Srbije i inostanstva koje se bave proizvodnjom, trgovinom i uslugama iz sfere građevinarstva. Sajam je održan pod pokroviteljstvom Ministarstva građevinarstva, saobraćaja i infrastrukture. Obuhvatio je Sajam sve segmente građevinske industrije, od projektovanja i izgradnje do predavljanja najsavremenijih građevinskih materijala, mašina, uređaja i alata. Izlagači su i ove godine spremili popuste za svoj asortiman proizvoda i usluga, koji su se kretali od 5 do 30 odsto, kao i posebne uslove plaćanja i mogućnost kupovine na kredit. Sajam građevinarstva jedan je od najznačajnijih poslovnih sajmova u Srbiji i regionu, i događaj koji je za sve učesnike i posjetioce idealna prilika i ambijent za premijerna predavljanja inovacija i tehničko-tehnoloških rješenja. Ovogodišnja sajamska postavka bila je, kao i svake godine, i sadržajno i dizajnerski inovirana. Nove tehnologije bile su prisutne u svakom segmentu manifestacije, upravo zbog konstantne potrebe za inovativnošću i napretkom u građevinskoj industriji. To važi za IT, digitalne, komunikacione tehnologije, sve vrste specijalizovanog, aplikativnog softvera, koji odavno u građevinarstvu nije novost i ekskluzivitet - već uspostavljeni standard. Tehničko tehnološka dostignuća posebno su primjetna u sistemima gradnje i materijalima. Ova specijalizovana međunarodna manifestacija obuhvata sve segmente građevinske industrije – od istraživanja i projektovanja, izgradnje i održavanja objekata u visokogradnji, niskogradnji i hidrogradnji, do predavljanja najsavremenijih materijala, građevinskih mašina, uređaja i alata.



Posebno značajan segment su dvije, od prošle godine prisutne, robne grupe: “Nekretnine i investicije” i “Arhitektura i urbanizam”. Na sajmu su predstavljeni investicioni projekti koji su šansa za domaće i regionalne građevinare. Pored uobičajenog učešća najznačajnijih predstavnika industrije građevinskih mašina i alata, promovisan je značajan broj proizvođača skela, kao i proizvođača opeke. Svim učesnicima i poslovnim posetiocima 45. Sajma građevinarstva na raspolaganju je bio B2B poslovni portal, koji je sa ciljem umrežavanja uspješno implementiran posljednjih godina na najvećim manifestacijama Beogradskog sajma. Po uzoru na velike svjetske sajmove, Beogradski sajam je uložio napore da biznis segment podigne na viši nivo i ponudi učesnicima sajma mogućnost da lakše i brže dođu do potencijalnih poslovnih partnera i prije samog događaja, štedeći vrijeme i energiju, zakažu poslovne sastanke sa učesnicima sajma. Sva unaprijedena i kreativna energija uloženi su sa ciljem podsticaja privrede, povećanja izvoza domaćih i proizvoda iz regiona, kao i osvajanja novih tržišta. SEEBBE 2019 je mjesto za ispitivanje tržišta, uspostavljanje saradnje i pokretanje novih projekata, a za domaće izlagače svakako i način da uvek budu u centru inovacija i na nivou kriterijuma koje zahtijevaju svjetski standardi. Jedan od osnovnih komercijalnih ciljeva Sajma građevinarstva je da gradnju, građevinske materijale i projekte plasira što širem krugu posetilaca i učini ih dostupnijim.



Kantonalna privredna komora Tuzla i ove godine je, drugi put za redom, obezbijedila sajamski prostor za firme članice Komore. I ove godine se bilježi uspješan nastup firmi iz oblasti građevinarstva sa područja Tuzlanskog kantona. Ostavreni su novi kontakti, razmijenjena iskustva, ugovoreni novi poslovi. Na zajedničkom izložbenom prostoru, u Beogradu su se predstavili “Tehnograd Company” Tuzla, “Tuzla kvarc”, “Tehna” Gračanica, “Radius” Gračanica, “Annoa” Tuzla, “Lović & CO” Lukavac, “Xella BH” Tuzla, “Yavuz” Srebrenik, “Wortmann Metal” Tinja.

Pripremio: Dino Kalesić



Jubilarni 10. sajam u Gračanici...

Održan 10. međunarodni sajam 'Grapos Expo' Gračanica

Kantonalna privredna komora Tuzla i Vlada Tuzlanskog kantona, putem Ministarstva privrede, zajednički su pripremili prezentaciju o privrednim potencijalima Tuzlanskog kantona



U Gračanici je održan jubilarni, 10. po redu Međunarodni sajam poduzetništva i obrta "GRAPOS – EXPO". Ova, sada već tradicionalna manifestacija, ove godine se održavala na 12.000 kvadratnih metara zatvorenog i 7.000 kvadrata otvorenog prostora u Poslovnoj zoni „Fering“ u Gračanici. Činjenica da je okupio 335 izlagača iz Bosne i Hercegovine, Hrvatske, Slovenije, Austrije, Njemačke, Švedske i drugih zemalja, govori u prilog činjenici da je „Grapos Expo“ najveći sajam ove vrste u regionu. I ove godine su na Sajmu u fokusu bila mikro, mala i srednja preduzeća koja predstavljaju ključni generator ekonomskog razvoja. „**Za Tuzlanski kanton i Gračanicu ovaj sajam je svojevrsan praznik, a mogu slobodno reći, danas je on i jedan od zaštitnih znakova Gračanice i Tuzlanskog kantona. Uzimajući u obzir da je cilj sajma GRAPOS EKSP-a ostvarivanje pozitivnog utjecaja na privredni razvoj i stvaranje pozitivne poduzetničke klime, te povećanje konkurentnosti privrednog sektora, kao i bolje međusobno povezivanje privrednih subjekata i poduzetničkih regija, možemo reći da se on u potpunosti poklapa sa strateškim opredjeljenjem Vlade Tuzlanskog kantona**“, rekao je premijer Tuzlanskog kantona Jakub Suljkanović, koji se u ime pokrovitelja Sajma, Vlade Tuzlanskog kantona, obratio posjetiocima. Osim premijera Suljkanovića, na svečanoj ceremoniji otvaranja Sajma, učesnicima Sajma i prisutnim gostima su se obratili direktor Sajma Nedžad Nuhanović, načelnik općine Gračanica Nusret Helić i predsjednik Hrvatske obrtničke komore Dragutin Ranogajec. Prema mišljenjima izlagača i posjetilaca, ovogodišnji sajam Grapos expo po svom sadržaju i obimu, tematskim cjelinama i učesnicima može biti uzor ne samo sajmovima u BiH, nego i šire. Sajam je obogaćen raznim okruglim stolovima na različite ekonomske i privredne teme, panel diskusijama i predavanjima na kojima će učestvovati eminentni stručnjaci iz oblasti privrede i politike.



„Svi sadržaju imaju za cilj razvoj i stvaranje novih ideja, a time i novi radnih mjesta što je glavni moto Sajma. Novost ove godine je auto šou i kvalitetne vansajamske aktivnosti, te veliki broj proizvodnih firmi i popusti, nagrade i prezentacije“, rekao je direktor sajma Nedžad Nuhanović.

U svom obraćanju prisutnima Nusret Helić, načelnik Općine Gračanica u ime organizatora i domaćina rekao je kako je samo udruživanjem snaga, volje i pameti moguće stvarati povoljniju klimu za razvoj društva, te da tako i ovaj Sajam omogućuje stvaranje novih poslovnih prilika.

Kantonalna privredna komore Tuzla je ina ovoj sajamskoj manifestaciji omogućila svojim članicama da se predstave, promovišu svoje firme, aktivnosti, proizvode, ostvare nove kontakte, razmijene iskustva. Ovoga puta na oko 100 kvadratnih metara predstavljeno je 36 ustanova, institucija, firmi članica Komore. Komora je zajedničku sajamsku postavku realizovala u saradnji sa Ministarstvom privrede Tuzlanskog kantona.



U okviru sajmskih aktivnosti, Kantonalna privredna komora Tuzla i Vlada Tuzlanskog kantona, putem Ministarstva privrede, zajednički su pripremili prezentaciju o privrednim potencijalima Tuzlanskog kantona. Ovom prilikom privrednici su dobili informacije o podrškama koje pružaju Vlada i Ministarstvo privrede TK kao i Federalno ministarstvo razvoja, poduzetništva i obrta, te saznati pojedinosti koje se tiču javno-privatnog partnerstva.

D.K.

Najava sajamskih manifestacija...

Sajam „LIST 2019“, Lukavac od 9. do 11. maja

Međunarodni sajam turizma i ekologije „LIST 2019“ Lukavac



U saradnji sa Općinom Lukavac i Turističkom zajednicom Tuzlanskog kantona, a uz podršku Vlade Tuzlanskog kantona, Lukavački sajam organ izuje 17. Međunarodni sajam turizma i ekologije „LIST“ 2019, koji će se održati u terminu od 9. do 11. maja 2019. godine u Lukavcu. Od 2017. godine Sajmu turizma je dodana i komponenta ekologije što je svakako doprinijelo zanimanju različitih subjekata k oji se bave pitanjem okoliša, te kompanija koje se bave novim tehnologijama i proizvodnjom uređaja za prečišćavanje. Međunarodni sajam turizma i ekologije „LIST 2019“ Lukavac će i ove godine biti organizovan na prostoru kulturnog i sportsko rekreacionog središta grada Lukavca na zatvorenom izložbenom prostoru od cca 2.500 m2 te na oko 2.000 m2 otvorenog izložbenog prostora. S obzirom na važnost ovog kulturnog događaja i koristi za sve građane i širu

društvu zajednicu pozivamo Vas da uzmete učešće i na taj način budete dio 17. Međunarodnog sajma turizma i ekologije „LIST“ 2019. Za dodatne informacije možete posjetiti našu web stranicu www.lukavacki-sajam.com. Više informacija na mob.: +387 61/721-561; +387 63/391-827; tel./fax +387 35/574-700; e-mail: lukavacki_sajam@yahoo.de.

9. sajam „ENERGA“, 11-13. juna 2019.

Međunarodni sajam i konferencija energije, rudarstva, zaštite okoliša i prateće industrije, ENERGA



Ponosni na dosadašnje uspjehe međunarodnog sajma i konferencije ENERGA, najavljujemo naredno, 9. izdanje za 11-13. juna / lipnja 2019. godine u Sarajevu. U proteklom periodu, zahvaljujući kvalitetu sajamskog i konferencijskog sadržaja, uspjeli smo da se nametnemo kao regionalno prepoznatljiv događaj čije vrijeme održavanja postaje važan datum u kalendaru energetskog sektora Jugoistočne Europe. ENERGA je mjesto gdje se možete upoznati sa novim tehnologijama, dostignućima energetskih kompanija, razvojem i rezultatima energetskih politika i strategija, integracijom obnovljivih izvora, razvojem energetskih tržišta odnosno trendovima neizbježne sveukupne tranzicije energetskog sektora. Svjesni činjenice da inovativnost i tehnološki napredak čini osnovicu za dalji razvoj sektora, za 9. izdanje ENERGA najavljujemo veće prisustvo studenata, mladih stručnjaka i „start-up“ kompanija koji će kroz posebno osmišljen program nagrađivanja, sesije i dizajnirani sajamski izložbeni prostor moći prezentovati svoje poslovne ideje i projekte. ENERGA je projekat koji u saradnji sa akademskim institucijama, kompanijama, nevladinim sektorom, te stručnim saradnicima iz oblasti energetskog sektora kontinuirano privlači sve veći broj učesnika, te Vas pozivamo da i Vi budete dio ovog jedinstvenog događaja. Aktuelnošću tema, adekvatnim izborom govornika kao i zanimljivim sajamskim sadržajem opravdaćemo Vaše povjerenje. Očekujući Vašu prijavu za 9. izdanje ENERGA otvoreni smo za Vaše ideje, sugestije i prijedloge saradnje, sa iskrenom željom da Vaš nastup i poslovni rezultati budu što uspješniji.

D.K.



IZ Vanjskotrgovinske komore BiH...

VTK BiH izdala prvu elektronsku carinsku tranzitnu deklaraciju



Nakon što je okončala sve potrebne procedure, potpisala Sporazum sa ovlaštenim predstavnikom SGS Švicarska i educirala uposlenike za korištenje TransitNet platforme, dana 9.4.2019.godine, Vanjskotrgovinska komora Bosne i Hercegovine je izdala prvu tranzitnu deklaraciju za bh. prijevoznika iz Gradačca koji je izdatu deklaraciju koristio na relaciji Mađarska-Turska.

Kako smo i prethodno obavještavali, bh. prijevoznici već uveliko koriste tranzitne deklaracije izvan Bosne i Hercegovine, ali od jučerašnjeg dana su u prilici da na jednostavniji i povoljniji način do njih dođu,

kroz uslugu koju im pruža Vanjskotrgovinska komora BiH. Korištenje tranzitnih dokumenata za domaće prijevoznike će biti u potpunosti operativan nakon početka primjene NCTS-a (Novi kompjuterizirani tranzitni sistem), što, prema najavama iz Uprave za indirektno oporezivanje BiH, možemo očekivati 1.8.2019.godine, jer je povezan sa primjenom novog Zakona o carinskoj politici u BiH. Iz Sektora za transport i komunikacije pozivaju zainteresirane prijevoznike da ih kontaktiraju na telefon 033/566-222 ili mail tobrazac@komorabih.ba.

VTKBiH: Uskoro inicijativa za izmjenju CEFTA

CEFTA, sporazum koji omogućava slobodnu trgovinu između Srbije, Sjeverne Makedonije, Crne Gore, Bosne i Hercegovine, Kosova i Albanije, praktično je mrtva i neophodna je njena nadogradnja, a privredne komore ovih zemalja uskoro će i zvanično preko nadležnih ministarstava pokrenuti inicijativu da se ovaj sporazum, koji postoji od 2006. godine, revidira.

"CEFTA je prevaziđena. Jedna od grešaka je što njom nisu propisana pravila ponašanja na pravi način, ne postoje sankcije za kršenje ovog sporazuma i to se vidjelo na primjeru Kosova. Umjesto da smo tada bili solidarni i osudili takvo ponašanje, Makedonija i Hrvatska kao bivša članica jedva su dočekale da Kosovo tako nešto uradi kako bi ušli i osvojili tržište", rekao je Nemanja Vasić, potpredsjednik Vanjskotrgovinske komore BiH, dodajući da će uskoro nadležnom ministarstvu uputiti inicijativu za revidiranje CEFTA. Inače, pored Vasića i Vanjskotrgovinske komore BiH, i ostale zemlje koje su članice CEFTA slažu se s tim da je ovaj sporazum iscrpljen i prevaziđen, te da ga uz pokroviteljstvo i pod nadzorom EU treba nadograditi ili izraditi novi, koji bi dao novu dinamiku trgovini na ovom prostoru. Tokom nedavno održanog biznis foruma na Kopaoniku, predstavnici privrednih komora iz regiona usaglasili su se da pokrenu inicijativu za njegovu izmjenju. Kako su istakli tom prilikom, iza novog sporazuma neophodno je da stoji Evropska unija jer je politički kapacitet država na ovim prostorima na niskom nivou zajedništva i saradnje, te da iz tog razloga ne garantuje uspjeh. "Mora Evropa stajati iza toga. U suprotnom, to ne bi bila nadogradnja sporazuma i trebalo bi sve države međusobno da potpišu bilateralne ugovore i to ne bi onda imalo smisla.", rekao je Vasić. On naglašava da će bez nadogradnje CEFTA svi trpiti štetu, a najviše BiH, koja je i do sada od tog sporazuma imala najmanje koristi jer je jedina zemlja koja nikad i nikome nije uvodila nikakve barijere. I Branko Azeski, predsjednik Privredne komore Sjeverne Makedonije, rekao je da je vrijeme za novi aranžman koji će obezbijediti da se sporazum poštuje, a ne kao što je sada slučaj - da se krši bez ikakvih sankcija.



"Imamo problem između članica CEFTA i nemamo mehanizam da se to prevaziđe. Mislim da treba da se rodi nešto novo, neki novi oblik organizacije i saradnje između nas, koji će eliminisati slabosti CEFTA. Vlade ne mogu da vuku neodgovorne poteze i da za to ne snose određene sankcije. Na ovakav način puštamo signal Briselu da nismo spremni da međusobno saradujemo. Pokazali smo da nismo na nivou zadataka i da nismo sposobni da se nosimo s tim, pa kako ćemo onda da uđemo u EU.", rekao je nedavno Azeski. Novom CEFTA ili njenom nadogradnjom neophodno bi bilo otkloniti barijere koje sada postoje kao što su različita radna vremena fitosanitarnih službi na graničnim prelazima, zbog čega se gubi vrijeme i dolazi u situaciju da roba ne može da se carini isti dan. Prema određenim istraživanjima, na graničnim prelazima trenutno se čeka u prosjeku po 11 sati i gube se milioni radnih sati bez ikakve potrebe. I Marko Čadež, predsjednik Privredne komore Srbije, ocijenio je da je CEFTA prevaziđena i da treba sveobuhvatni sporazum koji će sinhronizovati dokumente, diplome, usluge te da je neophodna nova faza ili da ostanemo na nivou ad hok barijera i uvođenja taksi.

D.K.



Led display na zgradi Komore...

NOVA USLUGA ČLANICAMA I FIRMAMA U TK




Poštovani, Led digitalno oglašavanje, u poređenju s tradicionalnim medijima oglašavanja, poput billboarda, čijeg se sadržaja jedva sjeti manji od 40 posto gledatelja, u zadnje vrijeme ima velike prednosti. Osim mogućnosti višestrukog reklamiranja jednog oglašivača na istom mediju, dokazano je da su pokretne reklamne poruke daleko više privlačnije nego statične reklame. Obavještavamo vas da je Kantonalna privredna komora Tuzla u prilici ponuditi vam oglašavanje na našem led displayu po povoljnim uslovima.



POSTANITE PARTNER KANTONALNE PRIVREDNE KOMORE TUZLA!!!
OGLASITE SE NA NAŠEM LED DISPLAY PROSTORU!!!
ISKORISTITI IZUZETNO POVOLJNE GODIŠNJE I ŠESTOMJESEČNE PONUDE!!!
POSEBNE POGODNOSTI ZA FIRME ČLANICE KOMORE!!!
Kantonalna privredna komora Tuzla
Kontakt osoba: Dino Kalesić
mob: 061/164-311
tel: 035/369-562
mail: dino@kpktz.ba


POSJETITE NAS! DOĐITE DA SE DOGOVORIMO!!!






INDUSTRIJSKA PROIZVODNJA NA PODRUČJU TUZLANSKOG KANTONA

U 2018. godini nije došlo do promjene ukupnog obima industrijske proizvodnje u odnosu na 2017. godinu (indeks =100). Prema područjima, prerađivačka industrija ostvaruje rast od 3,6%, dok vađenje ruda i kamena ima pad obima proizvodnje od 1,9%, a proizvodnja i snabdijevanje električnom energijom pad od 5,4%.



Industrijska proizvodnja I-XII 2018/ I-XII 2017




ZAPOSLENOST I NEZAPOSLENOST U TUZLANSKOM KANTONU

Prema podacima Porezne uprave FBiH, u decembru 2018. godine broj zaposlenih na području Tuzlanskog kantona je 100.221.

Na evidenciji JU Služba za zapošljavanje Tuzlanskog kantona, Tuzla na kraju decembra 2018. godine evidentirano je 79.378 nezaposlenih osoba. Stručne osobe učestvuju sa 53.061 ili 66,85 %, a nestručne sa 26.317 ili 33,15%. U ukupnom broju osoba koje traže zaposlenje u decembru su 46.982 žene.

Broj osoba koje prvi put traže zaposlenje je 33.852 ili 42,6% u odnosu na ukupan broj nezaposlenih.

	Zaposleni	Nezaposleni
I 2018	97.876	84.450
II 2018	98.280	83.828
III 2018	98.735	82.537
IV 2018	98.774	81.479
V 2018	99.751	80.248
VI 2018	99.771	79.998
VII 2018	99.825	80.135
VIII 2018	98.859	80.666
IX 2018	100.005	80.167
X 2018	100.745	79.557
XI 2018	100.462	79.428
XII 2018	100.221	79.378



Zaposleni i nezaposleni u 2018. godini


SPOLJNOTRGOVINSKA RAZMJENA TUZLANSKOG KANTONA

U 2018. godini iz Tuzlanskog kantona ukupno je izvezeno proizvoda u vrijednosti od 1.729.499.000 KM što je u odnosu na izvoz u 2017. godini rast od 11,7%. U isto vrijeme je došlo do rasta uvoza od 8,4% te je uvezeno roba u vrijednosti od 1.942.320.000 KM. Pokrivenost uvoza izvozom je 88,04%, a vanjskotrgovinski deficit je 235.468.000 KM.

U odnosu na 2017. godinu, u 2018. došlo je rasta izvoza industrijskih materijala 7,2%, goriva i maziva 29,9%, kapitalnih proizvoda 16% i proizvoda za široku potrošnju 13%, dok je došlo do pada izvoza hrane i pića za 14,9% i transportnih sredstava 0,2%.

Rast uvoza u odnosu na 2017. godinu ostvaren je kod industrijskih materijala 8%, goriva i maziva 22,3%, proizvoda za široku potrošnju 8%, kapitalnih proizvoda 7,6%, te hrane i pića 0,3%. U istom periodu došlo je do pada uvoza transportnih sredstava 3,5%.

Najznačajniji vanjskotrgovinski partneri Tuzlanskog kantona su Njemačka, Slovenija, Italija, Hrvatska i Austrija.



	Zaposlenost (XII 2018)	Nezaposlenost (XII 2018)	Prosječna plaća (KM) (XII 2018)
UKUPNO	100.221	79.378	812
Banovići	5.828	4.604	918
Čelić	1.164	2.364	682
Doboj-Istok	2.490	1.948	568
Gračanica	10.812	7.399	622
Gradačac	9.116	6.278	688
Kalesija	5.462	7.191	670
Kladanj	2.221	2.347	733
Lukavac	10.465	8.299	802
Sapna	746	2.078	842
Srebrenik	7.746	7.482	707
Teočak	713	1.329	802
Tuzla	31.521	16.850	943
Živinice	11.936	11.209	794

Zaposleni i nezaposleni u općinama TK


KRETANJE NETO I BRUTO PLAĆA U TUZLANSKOM KANTONU

Prosječna neto plata u Tuzlanskom kantonu u decembru je iznosila 812,00 KM što je ispod prosjeka Federacije BiH. U odnosu na kantonalni prosjek iz 2017. godine, neto plaća je veća za 5,9%. Najviše prosječne neto plate u Tuzlanskom kantonu su u sektoru proizvodnje i opskrbe el.energijom (1.686 KM), dok su najniže prosječne neto plate u građevinarstvu (524 KM).

Djelatnost	Tuzlanski kanton	
	Neto plaća	Bruto plaća
A Poljoprivreda, šumarstvo i ribolov	726	1.089
B Vađenje ruda i kamena	979	1.497
C Prerađivačka industrija	634	951
D Proizvodnja i snabdijevanje el.en., plinom	1.686	2.634
E Snabdijevanje vodom i uklanjanje otpadnih voda	901	1.373
F Građevinarstvo	524	781
G Trgovina na veliko i malo	556	838
H Prevoz, skladištenje i komunikacije	711	1.074
I Hotelijerstvo i ugostiteljstvo	551	831
J Informacije i komunikacije	1.122	1.743
K Finansijske djelatnosti	1.373	2.149
L Poslovanje nekretninama	545	831
M Stručne, naučne i tehničke djelatnosti	953	1.472
N Administrativne i pomoćne uslužne djelatnosti	576	873
O Javna uprava i odbrana	1.173	1.810
P Obrazovanje	835	1.286
Q Zdravstvena socijalna zaštita	1.205	1.877
R Umjetnost, zabava i rekreacija	673	1.024
S Ostale uslužne djelatnosti	907	1.375



THE CHAMBER OF ECONOMY OF TUZLA CANTON



TUZLA CANTON

Your Business Partner

